

Wie man Muffeln / Boden- bletter / Schirben / vnnnd ander klein Töpff- ferwerck / zum Probirn gehörig ma- chen soll.

Solle billich ein jeder Probirer im fall der
noth / seine Probiröfen / Schirben / Tiegel / Muffeln / vñ
was er zu dem probirn täglich für Instrumenta bedarff /
selbst machen können / Dann man findet nicht an allen
orten Meister / die solchs zumachen wissen / vnd ob man
gleich offtmals viel fleiß anwendet / die Töpffer dahin zu bringen / daß
sie zu notturfft des Probirns / die zugehörigen Zeug machen sollen / so
geschichts doch vielmals / daß sie nichts guts noch etwas förmlichs
machen / mit dem dann ein Probirer nicht bestehē kan / Derwegen ich /
auch andere mehr (wo wir nit guten Zeug haben bekommen mögen)
offtmals verursacht worden / solchen selbst zu machen / Welches dann
also geschehen soll.

Von zube-
reitung des
Thons / vnd
was man
pfllegt da-
runter zu
mischen.

Nim guten Töpfferthon / so gut der zubekommen ist / doch wirt der
Thon / der Blaw / vnd im Feuer oder im brennen schön weiß wirt / der
beste zu diesem Zeug zugebrauchē befunden / Denselbigē Töpfferthon /
laß gar hart werden / oder an der Sonnen trucknen / vnd wann du da-
von Zeug machen wilt / so laß den Thon klein stossen / vnnnd feucht den
an mit Wasser / daß er weich werde / dann laß in trettē / oder mit einem
Eysen wol behren / vnd nim darunter kleinen geribnē geschlemten Kiz-
lingstein / oder weissen schönen Sand / so viel als der Thon leiden wil /
Damit du jm aber nit zu wenig oder zuviel thust / so mach erstlich von
solchem Zeug / etliche Probir schirben oder Tiegel / vnnnd probir darin-
nen ein streng hartflüssiges Erb / so sihestu ob der Zeug halten werd /
gut oder beständig sey / Es mengē auch etliche ein Kreiden gestein / oder
des subtilen roten Talcis vnnnd Glimmers / an denen orten da es des-
selben viel hat / darunter / welches aber am besten dienstlich seyn wirt /
das wirt die erfahrung geben / Etliche nemen für solchs / die zubrochne
schirben von Töpfferwerck / oder die alten Tiegel / klein gestossen vnnnd
durch ein Sieblein gereden / vnter den Thon / so viel daß sie den Thon
vor sprödigkeit kaum arbeiten können / Solche Tiegel vñ schirben da-
von gemacht / halten auch wol / wann aber Kizlingstein also wie oben
bericht / darunter gebraucht wirt / der bindet im Feuer zusammen /
vnd